

四庫全書

史部

欽定四庫全書

史部

兩漢筆記卷三

詳校官編修臣錢樾

編修臣程嘉謨覆勘

覆校官中書臣康儀鈞

校對官中書臣王鍾泰

謄錄監生臣張士琛

欽定四庫全書

史部十五

兩漢筆記

史評類

提要

臣等謹案兩漢筆記十二卷宋錢時撰時有融堂書解已著錄此書皆評論漢史嘉熙二年嘗經奏進前有尚書省劄稱十二卷與此本合葉盛水東日記以為不完之本非也其例以兩漢書舊文為綱而各附論斷于其下

前一二卷頗染胡寅讀史管見之習如蕭何收秦圖籍則責其不收六經又何勸高帝勿攻項羽歸蜀則責其出於詐術以曹參文帝為陷溺于邪說而歸其過于張良于陸賈新語則責其不知仁義皆故為苛論以自矜高識三卷以後乃漸近情理持論多得是非之平其中如于張良諫封六國後論封建必不可復郡縣不能不置于董仲舒請限民名田論

井田必不可行于文帝除肉刑亦不甚以為
過尤能滌講學家胸無一物高談三代之窠
臼至其論董仲舒對策以道之大原不在天
而在心則金谿學派之宗旨論元帝以客禮
待呼韓邪論光武閉關謝西域皆極稱其能
忍善讓則南渡和議之飾詞所為有為言之
者置而不論可矣乾隆四十二年五月恭校

上

總纂官

臣紀昀
臣陸錫熊
臣孫士毅

總校官

臣陸費墀

欽定四庫全書

兩漢筆記卷一

宋 錢時 撰

高祖

秦二世二年初楚懷王與諸將約先入關中者王之當
是時秦兵彊諸將莫利先入關獨項羽怨秦之殺項梁
奮願與沛公西入關懷王與諸老將皆曰項羽爲人慄
悍猾賊嘗攻襄城襄城無遺類皆坑之諸所過無不殘
滅且楚數進取前陳王項梁皆敗不如更遣長者扶義

而西告諭秦父兄秦父兄苦其主久矣今誠得長者往
無侵暴宜可下項羽不可遣獨沛公素寬大長者可遣
懷王乃不許項羽而遣沛公

湯伐夏曰與爾有衆請命武王伐商曰元后作民父
母此萬世君人之大法弔民伐罪之深旨秦爲無道
羣雄並逐後後來蘇此其時也如避水火益深益熱
烏在其爲民父母哉愚觀項羽盜賊之雄耳凡其失
人心處全在殘忍沛公脫秦民於水火者也凡其得

人心處全在寬大獨遣長者扶義而西而不許項羽
非懷王之賢不至是然亦當時親被苦禍與秦民同
在水火之中故其推擇權量的當如是向使從羽之
請與沛公俱遣慄悍猾賊如虎狼之求逞必悶悶不
快於長者之事而卿子冠軍之劒且轉而之沛公矣
其禍可勝言乎沛公入關秦民大喜而漢氏四百年
之祚卒定於此日有以也夫

元年冬十月沛公西入咸陽諸將皆爭走金帛財物之

府分之蕭何獨先入收秦丞相府圖籍藏之以此沛公得具知天下阨塞戶口多少彊弱之處

始皇三十四年丞相李斯請史官非秦記皆燒之非博士官所職天下有藏詩書百家語者詣守尉雜燒之是所燒者天下之書而博士官所職固無恙也蕭何知所先務悉取而藏之他時律令於焉憲章則先王之大經大法具在一洗秦人之陋及三代盛王之規模其機正在今日高祖雖不脩文學然觀其既定

天下聞陸賈新語而稱善用叔孫通綿蕝之儀而知
貴此如田野鄙夫素不知文事之可樂一旦致家富
饒則亦從事於禮文教子孫以詩書矣誰謂溺冠跨
項終不可與言也且秦所謂丞相者何人哉所藏圖
籍不過商鞅李斯之徒破壞先王成憲爲此殘酷淫
虐之具耳何也不急急於聖賢經傳而惟殘酷淫虐
之具是取遂使漢家制度動循秦舊後世雖有好文
之主出殘編於煨燼而表章之而蕭規曹隨守爲鵠

金史卷一百一十五
卷一
的寥寥六藝猶空言也悲夫

沛公見秦宮室帷帳狗馬重寶婦女以千數意欲留居之樊噲諫曰沛公欲有天下耶將爲富家翁耶凡此奢麗之物皆秦之所以亡也沛公何用焉願急還霸上無留宮中沛公不聽張良曰秦爲無道故沛公得至此夫爲天下除殘賊宜縞素爲資今始入秦即安其樂此所謂助桀爲虐且忠言逆耳利於行毒藥苦口利於病願沛公聽樊噲言沛公乃還軍霸上

愚觀沛公西入咸陽諸將皆爭走金帛財物之府分之此其所爲與盜賊無異未嘗不竊怪及沛公欲留居秦宮室則不特張良能諫而樊噲首諫議論卓犖無愧昔賢然後知興王之佐識見固自不同也使沛公一有苟安之意而諸臣不務遠畧遂相與窟宅其中則豈惟不足以規模天下羽之入關也而聞有此必將不勝其忿與沛公決死於一戰雖欲鴻門夜遁不可得矣何者秦宮室所有固沐猴而冠者所必爭

也是故寧失關中斷不肯失此於劉氏觀其後日燒秦宮室收寶貨婦女而東其爲人心事可見矣雖然羽不足道也范增切切勸羽殺沛公至若此類乃羽之所以自殺者而噤不能效一語曾樊噲之見不若是楚君臣俱不足道也不旋踵而敗宜哉

沛公悉召諸縣父老豪傑謂曰父老苦秦苛法久矣吾與諸侯約先入關者王之吾當王關中與父老約法三章耳殺人者死傷人及盜抵罪餘悉除去秦法諸吏民

皆安堵如故

秦網苛密民無所措手足一旦而遇三章之約如脫
之湯鼎濯之清波之上其爲喜幸何如哉此高祖入
關第一急務其功用可與武王之反商政相配蓋由
天姿寬厚出於特見非有譜之可按也視古憲章雖
尚踈畧而此時此意實漢家一代法制之祖後世子
孫當視之如命脉矣而乃有張湯杜周之徒得而甘
心焉何也

項羽引兵西屠咸陽殺秦降王子嬰燒秦宮室火三月
不滅收其貨寶婦女而東秦民大失望韓生說項羽關
中阻山帶河四塞之地地肥饒可都以霸項羽見秦宮
室皆已燒殘破心思東歸使人致命懷王懷王曰如約
項羽怒曰懷王者吾家所立耳非有功伐何以得專主
約天下春正月羽陽尊懷王爲義帝徙於江南江都二
月羽分天下王諸將羽自立爲西楚霸王王梁楚地九
郡都彭城乃曰巴蜀亦關中地也立沛公爲漢王王巴

蜀漢中都南鄭而三分關中王秦降將以距塞漢路漢王怒欲攻項羽蕭何諫曰雖王漢中之惡不猶愈於死乎夫能詘於一人之下而信於萬乘之上者湯武是也臣願大王王漢中養其民以致賢人收用巴蜀還定三秦天下可圖也漢王曰善乃遂就國

使項羽而先入關則必責懷王以如約矣關中之地豈他人所得有哉蓋其爲人負氣尚勇不肯出沛公之後是以屠咸陽殺子嬰燒宮室收貨寶婦女而動

東歸之思非其本心也及聞懷王如約之言即怒而徙之如逐奴隸自王梁楚而遷沛公漢中一旦發露不可得而掩矣使沛公不忍小忿遽起而與之角其不至於自斃者幾希是故羽之粗暴每每見容於沛公凡委靡退遜斂然而不敢較者皆沛公之所以勝而項羽之所以敗也沛公當時亦幾不能忍賴蕭何以濟有功多矣惜乎未免出於詐術非王者之所尚云

二年漢王南渡平陰津至洛陽新城三老董公遮說王
曰兵出無名事故不成明其爲賊敵乃可服項羽爲無
道放殺其主天下之賊也大王宜率三軍之衆爲之素
服以告諸侯而伐之則四海之內莫不仰德此三王之
舉也於是漢王爲義帝發喪袒而大哭哀臨三日發使
告諸侯擊楚之殺義帝者項王旣擊齊欲遂破之而後
擊漢漢王以故得率諸侯兵凡五十六萬人伐楚入彭
城收其貨寶美人日置酒高會項王聞之令諸將擊齊

而自以精兵三萬人南從魯出胡陵至蕭晨擊漢軍而東至彭城日中大破漢軍日入穀泗水死者十餘萬人又追擊至靈壁東睢水上漢軍却爲楚所擠卒十餘萬人皆入睢水水爲之不流圍漢王三匝會大風從西北起折木發屋揚沙石窈冥晝晦逢迎楚軍大亂壞散而漢王乃得與數十騎遁去諸侯皆背漢復與楚

漢王與項羽比肩而事義帝義帝遭弑而漢王發兵以討賊此人心之公忿萬世之大法也是故義旗一

舉而諸侯五十六萬之衆西面而響應之暨入彭城
乃收其貨寶美人日置酒高會此何爲者哉且前日
之袒而大哭者誰也今日之置酒高會者又誰也縞
素哀臨曾幾何時貨寶美人輒據其窟穴而樂之王
者之師顧如是乎使漢王之討賊也發於中心激於
大義則入其境踐其宮戚然常若義帝之寃乎其
上而哀傷惻怛所在乎見之項羽雖悍亦且覓梟
喪而不能武矣安有五十六萬之衆而摧拉於三萬者

惟其信不由中而託名於義帝是山東貪財好色之習雖能彊過於入關之始而終不能自禁於入彭城之時然則項羽者義帝之賊而漢王者又項羽之賊也漢王之得不死已幸矣諸侯背漢與楚豈待睢水狼狽而後見乎孟子曰今之諸侯五霸之罪人也愚是以於漢王而三歎

漢王問群臣曰吾欲捐關以東等棄之誰可與共功者張良曰九江王布楚梟將與項王有隙彭越與齊反梁

地此兩人可急使而漢王之將獨韓信可屬大事當一面即欲捐之捐之此三人則楚可破也

伊尹醜夏歸亳而成湯伐商之計定民獻十夫于翼而周公東征之謀決賢者之歸天之命也安有誘人之叛臣籠絡而用之而能保其終不我叛者道德不足以服英雄豪傑之心區區術數苟焉以集事而殖醢斧鉞之禍已階於謀捐地之日矣漢之君臣亦險詐矣哉

立子盈爲太子赦罪人

宥過無大刑故無小青災肆赦怙終賊刑此有虞氏
之大法萬世不可改者未聞因事推恩有罪而例赦
之也有罪而得以赦免刑小人何所懼而不爲惡哉
名曰好生而實陷天下於刑戮此赦罪人之謂矣後
世承襲名色益多三歲一郊巨姦劇猾可以數日而
待刑罰如之何其清民如之何其服也或曰一旦驟
革恐召怨致亂曰諸葛亮治蜀不赦

三年冬十月韓信張耳以兵數萬東擊趙廣武君李左車說成安君曰韓信張耳乘勝而去國遠鬪其鋒不可當臣聞千里餽糧士有飢色樵蘇後爨師不宿飽今井陘之道車不得方軌騎不得成列行數百里其勢糧食必在其後願足下假臣奇兵三萬人從間路絕其輜重足下深溝高壘勿與戰彼前不得鬪退不得還野無所掠不至十日而兩將之頭可致於麾下否則必爲二子所擒矣成安君嘗自稱義兵不用詐謀奇計曰韓信兵

少而疲如此避而不擊則諸侯謂吾怯而輕來伐我矣
韓信使人間視知其不用廣武君策則大喜乃敢引兵
遂下大破趙軍斬成安君泚水上擒趙王歇

義師不用詐謀固也信若成安君之不用詐謀以敗
則先王政典皆不可用於後世乎曰不然師直爲壯
行險而順防患也密慮敵也周雖不行詐以薄人亦
必不墮人之詐以取敗此王者所以萬全而動也後
世量力度德莫能相尚所恃以爭勝負者詐謀而已

耳無義師之實而欲假義師之名慮敵之不周防患之不密以致身殞國喪如探籠穽而屠之遂使流俗之論謂王者之兵真無用於後世後世非詐謀不可皆宋襄公成安君之徒實誤之也孔子曰我戰則克豈用詐謀

楚數侵奪漢甬道漢軍乏食漢王與酈食其謀撓楚權食其曰昔湯伐桀封其後於杞武王伐紂封其後於宋今秦失德棄義侵伐諸侯滅其社稷使無立錫之地陞

下誠能立六國之後此其君臣百姓必皆戴陛下之德
莫不嚮風慕義願爲臣妾德義已行陛下南嚮稱霸楚
必斂衽而朝漢王曰善趣刻印先生因行佩之矣食其
未行張良從外來謁漢王方食曰子房前客有爲我計
撓楚權者具以酈生語告良曰何如良曰誰爲陛下畫
此計者陛下事去矣漢王曰何哉對曰臣請偕前箸爲
大王籌之昔湯武封桀紂之後者度能制其死生之命
也今陛下能制項籍之死命乎其不可一也武王入殷

表商容之閭釋箕子之囚封比干之墓今陛下能乎其
不可二也發巨橋之粟散鹿臺之錢以賜貧窮今陛下
能乎其不可三也殷事已畢偃革爲軒倒載干戈示天
下不復用兵今陛下能乎其不可四也休馬華山之陽
示無所爲今陛下能乎其不可五也放牛桃林之野以
示不復輸積今陛下能乎其不可六也天下游士離其
親戚棄墳墓去故舊從陛下游者徒欲日夜望咫尺之
地今復立六國之後天下游士各歸事其主從其親戚

反其故舊墳墓陛下與誰取天下乎其不可七也且夫
楚唯無彊六國立者復撓而從之陛下焉得而臣之其
不可八也誠用客之謀陛下事去矣漢王輟食吐哺罵
曰豎儒幾敗而公事今趣銷印

愚嘗謂黜陟明而後封建立有王者作而後黜陟行
後世黜陟之法廢凡諸侯子孫無賢不肖皆得而世
襲之是以陸梁相吞曰兼曰削而封建壞矣禹會塗
山執玉帛者萬國周十八百國下逮春秋見於記載

二百餘國而已戰國之末遂併爲七焉此封建大弊
極壞之時也至秦而郡縣之益其勢不得不然兩雄
方張未知所定乃欲循封建末流之故事割裂大勢
立六國後而資之爲犄角之助豈理也哉子房止之
是也然但謂天下游士各歸事其主無與取天下而
未嘗深明封建之本末是故雖能排酈生之說於一
時而終不能弭大封侯國之禍於後日此子房不學
之病也至若武王入商封墓表閭散財發粟此吊民

伐罪之後興王第一規模顧何不可能之有子房不
惟不啟廸之且迎其鋒而拒絕之枚舉歷數斷斷乎
限高祖以不能愚是以深惜子房之未嘗學也

漢王謂陳平曰天下紛紛何時定乎陳平曰項王骨鯁
之臣亞父鍾離昧龍且周殷之屬不過數人耳大王誠
能出捐數萬斤金行反間間其君臣以疑其心項王爲
人意忌信讒必內相誅漢因舉兵而攻之破楚必矣漢
王曰善乃出黃金四萬斤與平恣所爲不問其出入平

多以金縱反間於楚軍宣言諸將鍾離昧等爲項王將
功多矣然而終不得裂地而王欲與漢爲一以滅項氏
而分王其地項羽果意不信鍾離昧等夏四月楚圍漢
王於滎陽急漢王請和割滎陽以西者爲漢亞父勸羽
急攻滎陽漢王患之項王使使至漢陳平使爲太牢具
舉進見楚使即佯驚曰吾以爲亞父使乃項王使復持
去更以惡草具進楚使楚使歸具以報項王項王果大
疑亞父亞父欲急攻下滎陽城項王不信不肯聽亞父

聞項王疑之乃怒曰天下事大定矣君王自爲之願請骸骨歸未至彭城疽發背而死

甚矣反間之可畏也間行於家則家睽間行於國則國亂君臣父子兄弟夫婦至於相殘相賊而不相保吁有由矣武涉說韓信信曰漢王深親信我我倍之不祥雖死不易答蒯徹則又曰漢王遇我甚厚我豈可以鄉利而倍義乎君信其臣故臣亦信其君雖欲間何自入哉隨何之言一行於九江而黥布叛陳平

之謀一行於楚而范增鍾離昧之屬危無他意忌信
讒反間之路也益告舜曰任賢勿貳去邪勿疑孔子
曰浸潤之譖膚受之愬不行焉可謂明也已矣浸潤
之譖膚受之愬不行焉可謂遠也已矣此萬世之大
訓也觀陳平爲計傾敵巧險如此爲人上者可不戒
懼矣哉

四年漢王大破楚軍復取成臯軍廣武就敖倉食項羽
下梁地聞成臯破乃引兵還漢軍方圍鍾離昧於滎陽

東聞羽至盡走險阻羽亦軍廣武與漢相守數月楚軍食少項王患之乃爲高祖置太公其上告漢王曰今不急下吾烹太公漢王曰吾與羽俱北面受命懷王約爲兄弟吾翁即若翁必欲烹而翁幸分我一杯羹項王怒欲殺之項伯曰天下事未可知且爲天下者不顧家雖殺之無益祇益禍耳項王從之

古之王者行一不義殺一不辜而得天下不爲安有不顧其父之死而得天下而可爲歟漢王杯羹之言

聞之使人股栗吁忍矣哉此戰國險詐之風不足多
罪也然以當時事勢籌之使漢王不忍於太公而遂
降楚楚將何以處之乎其死於羽之手也明矣漢王
死則太公呂后亦必與之俱死羽方要我而我視之
若無有焉羽知殺太公無益於成敗之數且留之猶
萬有一於後日是漢王忍於不顧者乃所以全太公
也或曰然則策莫良於此矣古聖賢處之將安出乎
曰王者之師萬全而動蓋不至有太公入楚之事也

後世行險以徼幸而後視此爲良策此君子之所羞
稱歟

韓信使人言漢王曰齊僞詐多變反覆之國也南邊楚
請爲假王以鎮之漢王發書大怒罵曰吾困於此旦暮
望若來佐我乃欲自立爲王張良陳平躡漢王足因附
耳語曰漢方不利寧能禁信之自王乎不如因而立之
善遇使自爲守不然變生漢王亦悟因復罵曰大丈夫
定諸侯即爲真王耳何以假爲春二月遣張良操印立

韓信爲齊王徵其兵擊楚

天無二日民無二王王者天下歸往之謂也古之封國公侯伯子男凡五等周衰禮樂征伐不出於上而後諸侯彊大僭號此豈天下一家爵命之名也哉項羽襲戰國之陋裂地而王諸侯此其舉措已大可笑安有人臣奉命出征得國自請爲王以鎮之而上不疑者是破趙而請王張耳此韓信欲王之機也破齊而請爲假王此高祖僞遊雲夢之機也觀書至此可

爲痛心

五年項王至垓下兵少食盡與漢戰不勝入壁漢軍及諸侯兵圍之數重於是項王乘其駿馬麾下壯士騎從者八百餘人直夜潰圍南出馳走平明漢軍乃覺之令騎將灌嬰以五千騎追之項王渡淮騎能屬者纔百餘人至陰陵迷失道陷大澤中以故漢追及之項王乃復引兵而東至東城乃有二十八騎漢騎追者數千人項王自度不得脫謂其騎曰吾起兵至今八歲矣身七十

餘戰未嘗敗北遂霸天下然今卒困於此此天之亡我
非戰之罪也

項羽可君乎曰殘暴忍人也屠城坑卒如斃狐鼠安
能爲君可臣乎曰從鄉子冠軍則斬鄉子冠軍事義
帝則殺義帝安能爲臣然則斯人也奚施而可曰是
特助漢平蕩之具耳春秋而下用兵爭強英雄豪傑
不聞義理之訓而惟富彊之是尚風聲氣習舉世訐
然皆戰場也至秦極殺伐之禍而僅勝之又不能教

化以善其心而惟束之以法律忿鬱慘毒之氣久遏而不得逞一旦潰裂如虎豹脫圈檻爪牙競奮所在爲群莫不皆有出類之才絕人之力自非有大才力者雄於其間相與收拾而歸諸漢則天下紛紛豈一沛公所能獨辦也是故有沛公而又不能無項羽使之百戰百勝而終不使之保有尺寸之地若羽者真助漢平蕩之具也歟

楚地悉定獨魯不下漢王引天下兵欲屠之至其城下

猶聞絃誦之聲爲其守禮義之國爲主死節乃持項王頭以示魯父兄魯乃降

君子素其位而行不願乎其外一願乎外則所主者在物窮通得喪死生禍福皆得而動之矣易曰困亨曰大人否亨曰習坎有孚維心亨處困處否處險而不失其所亨焉此素位而行所以無入而不自得也漢王之兵薄魯城下而絃誦之聲不廢是豈可以勉強爲哉且自孔氏沒歷戰國兵爭之禍矣而此絃誦

之聲未嘗兵爭也歷嬴秦焚書阮儒之禍矣而此絃
誦之聲未嘗阮焚也鹿走秦原群雄競逐寸天尺地
焦然如在湯鼎中而此絃誦之聲家常日用自如也
兵屠吾城在頃刻間調度從容無異疇昔此豈一旦
倉卒所可辦者踐履純固不間險夷知有絃誦而不
知有生死知有孔氏之家法而不知有漢兵也漢王
方引天下之兵欲屠之悚然知其爲守禮義之國而
遂不敢嗚呼亦賢也已先聖之教於是且行於漢王

矣或曰若項羽則何如曰王陵之母不愛一死而教
子以母貳心此節義之婦也羽也禮而葬之封其墓
而旌表之則非特王陵爲之感動四海聞風亦莫不
爲之感動矣乃不勝其怒取而烹焉是一婦人之見
不若也豺狼虎豹逢人即噬安知禮義之可貴也哉
婁敬因虞將軍求見上上召見問之婁敬曰秦地被山
帶河四塞以爲固卒然有急百萬之衆可立具也陛下
入關而都之山東雖亂秦之故地可全而有帝問羣臣

羣臣皆山東人爭言周王數百年秦二世即亡洛陽東有城皋西有穀澠倍河鄉伊洛其固亦足恃也上問張良良曰洛陽雖有此固其中小不過數百里田地薄四面受敵此非用武之國也關中左穀函右隴蜀沃野千里南有巴蜀之饒北有胡苑之利阻三面而守獨以一面東制諸侯諸侯安定河渭漕輓天下西給京師諸侯有變順流而下足以委輸此所謂金城千里天府之國也上曰車駕西都長安

孟子曰固國不以山谿之險威天下不以兵革之利
得道者多助失道者寡助此萬世不易之確論也帝
王都邑初無定所豈專恃險以爲固哉召公之營洛
也拳拳乎祈天永命而自疾敬德之外無他說夏商
歷年惟不敬厥德乃早墜厥命婁敬未足多道也西
都長安未爲不可也張子房佐高帝取天下最號有
識建都定卜而於我乎問焉此正開陳敬德祈天之
時乃獨區區以洛陽爲非用武之國何其與召公之

見異也吳起曰在德不在險起何人而有是語爲子
房者寧不愧矣哉

張良素多病從上入關卽道引不食穀杜門不出曰家
世相韓及韓滅不愛萬金之資爲韓報讎彊秦天下振
動今以三寸舌爲帝者師封萬戶侯此布衣之極於良
足矣願棄人間事欲從赤松子遊耳

王者革命必有以新一代之規模武王之反商政是
也秦爲無道不師古治先王之禮樂法度掃地而亡

之焚書阬儒純用法律是以卒稔高斯之禍僅二世而遂亡然則漢之所宜反秦政者果安在哉崇儒術明教化與天下更始此第一急務也高祖不脩文學而性明達二三大臣當有以任其責矣況張良爲帝者師甫從入關卽道引辟穀此何爲者也且自古亂世必有大賢君子遁迹於天下是故夏之衰也伊尹在莘商之中微也傳說在版築及其亡也呂望在磻谿戰國至秦天下大亂凡出而自見於當時者大抵

挾數用術功利之徒耳抱道懷德遁世無悶者固不屑也兵將屠魯而猶聞絃誦之聲深造自得之功不變亂於死生禍福之境孔氏家法殆有人焉良也不於此時訪求遺逸而尊禮之闡明大道而教化之以開一代太平之基躋斯世於二帝三王之盛乃拳拳乎願棄人間事從赤松子遊謂之知幾免禍則可律以名教不得而辭其罪矣先儒謂子房有儒者氣象嗚呼子房非儒也嘗受教於圯上之老人其本領固

黃老之學耳自時厥後清淨如曹參恭儉如文帝而皆不免陷溺於此主盟斯道者無其人而異端邪說遂稱賢於天下子房實啟之也惜哉

後九月項王將鍾離昧素與楚王信善項王死後亡歸信漢王怨昧聞其在楚詔楚捕昧信初之國行縣邑陳兵出入六年冬十月人有上書告楚王信反者帝以問諸將皆曰亟發兵阬豎子耳帝默然又問陳平陳平曰人上書言信反信知之乎曰不知陳平曰陛下精兵

孰與楚上曰不能過平曰陛下諸將用兵有能過韓信者乎上曰莫及也平曰今兵不如楚精而將不能及舉兵攻之是趣之戰也竊爲陛下危之上曰爲之奈何曰古者天子有巡狩會諸侯陛下第出僞遊雲夢會諸侯於陳陳楚之西界信聞天子以好出遊其勢必無事而郊迎謁謁而陛下因禽之此特一力士之事耳帝以爲然乃發使告諸侯會陳吾將遊雲夢上因隨以行楚王信聞之自疑懼不知所爲或說信曰斬鍾離昧以謁上

上必喜無患信從之十二月上會諸侯於陳信持昧首
謁上上令武士縛信載後車信曰果若人言狡兔死走
狗烹高鳥盡良弓藏敵國破謀臣亡天下已定我固當
烹上曰人告公反遂械繫信以歸還至洛陽赦韓信封
爲淮陰侯

觀信答武涉蒯通之言豈有背漢之心哉而漢王之
疑則已兆於躡足之封矣固陵後期許地始來而漢
王之疑成矣項羽一死即奪其軍更齊與楚不少遼

緩而信之迹於是危矣地大兵強漢不能過此高祖之所日夜憂虞而不能釋者乃方收納亡將有詔弗捕陳兵出入自爲張皇此豈久安之道乎嗚呼高祖之視信猶養虎以禦羆也虎之得不死者以羆在焉羆死則虎亦死矣謂信爲反人知其誣而信小人固有以自取也至若僞遊雲夢則竊爲高祖羞之天子適諸侯曰巡狩巡狩者巡所守也夏諺曰一遊一豫爲諸侯度是豈可託之爲用詐之地乎今年即皇帝

位而明年以僞出狩禽一諸侯何以示信於天下矣
此陳平險詐無識有以誤之也

上嘗從容與信言諸將能將兵多少上問曰如我能將
幾何信曰陛下不過能將十萬上曰於君何如曰臣多
多而益善耳上笑曰多多益善何爲爲我禽信曰陛下
不能將兵而善將將此乃信之所以爲陛下禽也且陛
下所謂天授非人力也

古之人功高跡危而有一旦佯狂用晦者此明哲保

金史卷一百一十五 卷一
身之道也多多益善高祖之所以忌信正在乎此奪
楚王而侯封之誅戮之兆見矣爲信者斂形遁迹盡
喪其智勇於塊處無用之地尚庶幾焉猶之猛虎方
就圈檻而乃呀然出爪牙以自矜耀幾何其不速死
也嗚呼愚哉

兩漢筆記卷一

欽定四庫全書

兩漢筆記卷二

宋 錢時 撰

高祖

帝以天下初定子幼昆弟少懲秦孤立而亡欲大封同
姓以填撫天下春正月丙午分楚王信地爲二國以淮
東五十三縣立從兄將軍賈爲荊王以薛郡東海彭城
三十六縣立弟文信君交爲楚王壬子以雲中鴈門代
郡五十三縣立兄宜信侯喜爲代王以膠東膠西臨菑

濟北博陽城陽郡七十三縣立徵時外婦之子肥爲齊王諸民能齊言者皆以與齊

天子之制地方千里公侯皆方百里伯七十里子男五十里不能五十里不達於天子附於諸侯曰附庸名山大澤則不以封都城過百雉國之害也安有命之王爵連城數十南面稱孤而能遺子孫以無禍者古之封侯所以命德同姓異姓其度一也且天子守在四夷二帝三王豈皆同姓而後能填撫天下哉裂

土地而大封之不擇賢愚而世襲之其不度甚矣七
國之變蓋不待智者而後知也將以圖安適以速亂
寵之者所以禍之歟因觀自古地大兵彊而俾之世
襲未有不叛者漢事可監矣而唐不悟藩鎮之禍往
往反甚於漢惟我本朝置使按察或遷或易權在朝
廷自先王封建之法壞而綱維防範其制莫良於此
中興以來獨一蜀帥世掌兵柄而卒以稔禍可不戒
哉

帝悉去秦苛法爲簡易群臣飲酒爭功醉或妄呼拔劍擊柱帝益厭之叔孫通說上曰夫儒者難與進取可與守成臣願徵魯諸生與臣弟子共起朝儀帝曰得無難乎叔孫通曰五帝異樂三王不同禮禮者因時世人情爲之節文者也臣願頗采古禮與秦儀雜就之上曰可試爲之令易知度吾所能行者爲之於是叔孫通使徵魯諸生三十餘人魯有兩生不肯行曰公所事者且十主皆面諛以得親貴今天下初定死者未葬傷者未起

又欲起禮樂禮樂所起積德百年而後可興也吾不忍
爲公所爲公去矣無汙我叔孫通笑曰若真鄙儒也不
知時變遂與所徵三十人西上及左右爲學者與其弟
子百餘人爲綿蕞野外習之月餘言於上曰可試觀矣
上使行禮曰吾能爲此乃使羣臣習肄七年冬十月長
樂宮成諸侯羣臣皆朝賀先平明謁者治禮以次引
入殿門陳東西鄉衛官俠陛下及羅立廷中皆執兵張
旗幟於是皇帝傳警輦出房引諸侯王以下至吏六百

石以次奉賀莫不震恐肅敬至禮畢復置法酒諸侍坐
殿上皆伏抑首以尊卑次起上壽觴九行謁者言罷酒
御史執法舉不如儀者輒引去竟朝置酒無敢譴諫失
禮者於是帝曰吾乃今日知爲皇帝之貴也乃拜叔孫
通爲太常賜金五百斤初秦有天下悉內六國禮儀采
擇其尊君抑臣者存之及通制禮頗有所增損大抵皆
襲秦故自天子稱號下至佐僚及宮室官名少所變改
孔子曰克己復禮爲仁又曰人而不仁如禮何魯兩

生之罪叔孫通正洙泗之家法也禮云禮云玉帛云
乎哉夫禮本於太一分而爲天地轉而爲陰陽變而
爲四時列而爲鬼神君臣之所以義者此也父子之
所以親者此也夫婦之所以親者此也長幼之所以
序者此也朋友之所以信者此也人而無禮則近於
禽獸綱淪法斁天地易位其禍可勝言乎先王之成
憲至秦而大壞所謂尊君抑臣者不過嚴刑以繩之
峻法以束之耳安有所謂禮哉至其後也亂臣賊子

無父無君詐命而誅扶蘓舉兵入宮而弑胡亥此人
道之深痛無禮之極禍也有王者作所宜一洗汙俗
以反先王之盛尚忍踵之爲故事乎高帝起自匹夫
得綿蕞糠粃而行之已不翅足矣安知禮爲何事惜
也有魯兩生而不見於用遂使叔孫通苟襲秦舊著
爲定式而後來者終已不改可勝歎哉

八年匈奴冒頓數苦北邊上患之問劉敬劉敬曰天下
初定士卒罷於兵未可以武服也冒頓殺父代立妻羣

母以力爲威未可以仁義說也獨可以計久遠子孫爲臣耳然恐陛下不能爲上曰奈何對曰陛下誠能以適長公主妻之厚奉遺之彼必慕以爲閼氏生子必爲太子陛下以歲時漢所餘彼所鮮數問遺因使辯士風諭以禮節冒頓在固爲子壻死則外孫爲單于豈嘗聞外孫敢與大父抗禮者哉可無戰以漸臣也若陛下不能遣長公主而令宗室及後宮詐稱公主彼知不肯貴近無益也帝曰善欲遣長公主吕后日夜泣曰妾唯太子

一女奈何棄之匈奴上竟不能遣九年冬上取家人子
名爲長公主以妻單于使劉敬往結和親約

夫所貴於中國者明王在上立德無頗政教修明綱
常不紊此夷狄之所以懷服也舜曰柔遠能邇而難
士人蠻夷率服益曰罔違道以干百姓之譽罔拂百
姓以從己之欲無怠無荒四夷來王豈他有所謂御
戎之策也哉中國失所以爲尊而戾戾然以彊弱較
勝負譬猶學士大夫不自愛重而與市井無賴角一

旦之力蛇掉頭虎卷尾呀然奮矣愚嘗謂四夷交侵
中國失德之明驗高祖有天下爲衣冠禮樂之主不
思所以懷服之道而乃忿然輕舉取辱白登知力之
不可勝也而又不悟忍配子女以庶幾其不敢抗墮
王綱而亂族類辱二帝三王之統開萬世無窮之禍
婁敬不足道也而在廷諸臣曾無一人非之嗚呼閭
閻細民不輕許嫁堂堂中國捐帝姬爲羈縻夷狄之
具而不知耻其後武帝結烏孫共滅胡雖岑取以大

金史卷八十二 卷二
母爲妻而且聽之矣可爲哀痛已哉

十年定陶戚姬有寵於上生趙王如意上以太子仁弱
謂如意類己雖封爲趙王帝留之長安上之關東戚姬
常從日夜啼泣欲立其子吕后年長常留守益䟽上欲
廢太子而立趙王大臣爭之皆莫能得御史大夫周昌廷
爭之彊上問其說昌爲人吃又盛怒曰臣口不能言然
臣期期知其不可陛下欲廢太子臣期期不奉詔上欣
然而笑吕后側耳於東廂聽既罷見昌爲跪謝曰微君

太子幾廢時趙王年十歲上憂萬歲之後不全也符璽御史趙堯請爲趙王置貴強相及呂后太子羣臣素所敬憚者上曰誰可者堯曰御史大夫昌其人也上乃以昌相趙而以堯代昌爲御史大夫

大寶曰位非一家之私物主器者長乃萬世之公論寵溺嬖妾而輕搖儲貳高帝於是大繆矣且以呂后之悍黠屠韓彭如磔鼠孱然童稚豈區區之名所能尊之如意縱立必不能保其無禍於身後觀人彘可

見雖幸羽翼既成太子無恙而吕后自此視諸庶孽若仇敵矣豈獨慘烈之禍發於如意戚姬而已乎使帝不溺於邪處之有道相視一體無以生吕后嫉妬之心其於庶孽將由已出惠帝雖死高帝未爲無後也安忍提劉氏戮力百戰僅奪之天下而委之非類后只一子耳享國日淺又無嫡孫徘徊無聊臨朝擅命一旦忿發王諸吕黜劉氏而莫之恤高帝寵召之也嗚呼泗上亭長間關百戰而成帝業終其身師旅

不解幾死矢石之下而乃湛於愛慾骨肉相仇不一
再傳國命幾絕可為萬世戒矣

十一年陸生時時前說稱詩書帝罵之曰乃公居馬上
而得之安事詩書陸生曰居馬上得之寧可以馬上治
之乎且湯武逆取而以順守之文武並用長久之術也
昔者吳王夫差智伯秦始皇皆以極武而亡鄉使秦已
并天下法先聖行仁義陛下安得而有之帝有慙色曰
試為我著秦所以失天下吾所以得之者及古成敗之

國陸生乃粗述存亡之徵凡著十二篇每奏一篇帝未嘗不稱善左右呼萬歲號其書曰新語

謂行仁義法先聖足以保天下自孟軻氏歿未聞斯語嗚呼是儒者之言也詐力之徒爭馳競逐但計事之利害不顧理之是非權謀以為賢橫逆以為強威刑以為固安知仁義之為何事也哉古先聖王所以位天地育萬物維持三綱五常於不壞者仁義而已矣易傳有云立人之道曰仁與義人道不立本心晦

亡泯泯焚焚與禽獸無異弱肉強食天下壞亂如之
何其可保也高祖天姿寬大儼然長民之器惜乎粗
武不學而在廷又無儒者陳仁義於王前觀其聞賈
之言遽有慚色新語每奏孜孜稱善是孰使之然哉
即此知慚稱善之心即仁義之心賈也真能如孔孟
之告齊魯如伊周之輔太甲成王秉其善端闡明仁
義之旨使之一惟先聖之是法則漢其三代矣賈有
是言而學不足以進此謂湯武逆取而順守是未嘗

真知仁義之爲仁義也嗟夫

帝有疾惡見人卧禁中詔戶者無得入群臣絳灌等莫敢入十餘日舞陽侯樊噲排闥直入大臣隨之上獨枕一宦者卧噲等見上流涕曰始陛下與臣等起豐沛定天下何其壯也今天下已定又何憊也且陛下病甚大臣震恐不見臣等計事顧獨與一宦者絕乎且陛下獨不見趙高之事乎帝笑而起

顧命大臣道揚末命薨於路寢不死於婦人之手此

先君所以得正其終而嗣君所以得正其始也安有
卧病危疑之日拒羣臣於戶外而獨與一宦者處乎
後世宮門隔絕易主於內而外廷不知有不忍言者
舞陽侯之慮遠矣

秋七月淮南王布反汝陰侯滕公召故楚令君薛君問
之令君曰是固當反滕公曰上裂地而封之疏爵而王
之其反何也令君曰往年殺彭越前年殺韓信此三人
者同功一體之人也自疑禍及身故反耳滕公言之上

上乃召見問薛公薛公對曰布反不足恠也使布出於上計山東非漢之有也出於中計勝敗之數未可知也出於下計陛下安枕而卧矣上曰何謂上計對曰東取吳西取楚并齊取魯傳檄燕趙固守其所山東非漢之有也何謂中計東取吳西取楚并韓取魏據敖倉之粟塞成皋之口勝敗之數未可知也何謂下計東取吳西取下蔡歸重於越身歸長沙陛下安枕而卧漢無事矣上曰是計將安出對曰出下計上曰何謂廢上中計而

出下計對曰布故驪山之徒也自致萬乘之主此皆爲身不顧後爲百姓萬世慮者也故曰出下計上曰善於是自將兵而東羣臣居守皆送至霸上留侯病自彊起至曲郵見上曰楚人剽疾願上無與爭鋒因說上令大子爲將軍監關中兵布之初反謂其將曰上老矣厭兵必不能來使諸將諸將獨患淮陰彭越今皆已死餘不足畏故遂反果如薛公之言東擊荊荆王賈走死富陵盡劫其兵渡淮擊楚楚發兵與戰爲三軍布破其一軍

其二軍散走布遂引兵而西 十二年冬十月上與布
兵遇於蘄西布兵精甚上壁庸城望布軍置陳如項籍
軍上惡之與布相望見遙謂布曰何苦而反布曰欲為
帝耳上怒罵之遂大戰布軍敗走渡淮數止戰不利與
百餘人走江南上令別將追之番陽人殺布茲鄉民田
舍

漢所王諸將獨張耳吳芮以疾終其餘乃無一反
者高帝末年誅戮盡矣人謂地大兵彊其勢則然以

此觀之雖所居有必反之勢而所王者蓋不能不反人也何則商周革命皆以方伯之尊合天下諸侯以舉事故事定而天下又安秦雖無道不旋踵而亡然亦有國數百年而後得天下是以罷侯置守惟所欲爲而莫或制之若漢高帝非有德於民非有功於世非有位於朝廷之上與羣盜起布衣五載而成帝業自古及今未嘗有也當是時斬然出頭角者莫不皆有得鹿之志而高帝其翹楚耳是故非此曹則無與

共成功非捐地而王之則必不爲我用是諸人者不
得爲王不止爲王而不反其勢亦不止師之上六有
曰開國承家小人勿用小人勿用必亂邦也而況於
王乎況於盜賊之雄乎後世徃徃以能保功臣善光
武而謂帝爲少恩噫帝則少恩矣變主識物人誰敢
爭羣盜分賊不悞即鬪其所以得之者固不同也

十一月上過魯以太牢祠孔子

孔子之道如天地覆載如日月照臨萬衆之主拜跪

俯伏北面而師尊之爲百代衣冠禮樂之主太牢盛
典在今日豈足爲異然自當時言之是栖栖者顧何
人哉其生也奔走齊魯宋衛之郊而道不行其歿也
戰國從橫異端滋熾爲儀爲秦爲朱爲翟爲申爲韓
爲鞅爲斯而道不明區區所賴以垂世詔後者在書
亦且阨於阮焚湮沒而不耀而高帝則又溺冠騎項
粗武不學之人耳間關百戰收天下於羣雄之手曾
何有於異代之匹夫也夫莫大於天地莫重於宗廟

社稷寂然未聞修舉其所經歷皆古帝王之都亦寂然不聞推崇今而過魯非有故事之可循也而太牢之祠乃汲汲乎孔子是果何所見哉異時兵將屠城聞絃誦之聲亦固有感於魯矣而乃翁馬上得之安事詩書其氣習自若也一聞陸生行仁義法先聖之說而知慙著古今得失成敗之故而稱善曾未數月而遂有此其殆深有感於秦歟孔氏家風一朝而尊超卓邁倫標示千古三復斯舉使人端拜祇贊爲吾

道賀也

相國何以長安地陝上林中多空地棄願令民得入田
毋收藁爲禽獸食上大怒曰相國多受賈人財物乃爲
請吾苑下相國廷尉械繫之

自成湯咸至於帝乙成王畏相蕭相國佐帝定天下
功第一入田苑地未爲非也遽繫之廷尉此何禮哉
後世子孫殺戮大臣如刈草菅有以啟之矣雖然畏
相非嚴憚之若芒刺背上也孟子曰惟大人爲能格

君心之非相之足畏必大人而後可

上擊布時爲流矢所中行道疾甚呂后迎良醫醫入見
曰疾可治上嫚之曰吾以布衣提三尺劍取天下此非
天命乎命乃在天雖扁鵲何益遂不使治疾

孔子大聖人自謂五十而知天命高帝非真有見於
是也良由天姿勇決不撓於死生之變向使知學其
所進豈易量哉或曰我生不有命在天紂嘗有是言
矣何如曰此則紂之所以亡也若無事修爲一委諸

命而可則王其疾敬德召公何以告成王

呂后問曰陛下百歲後蕭相國既死誰令代之上曰曹參可問其次曰王陵可然少戇陳平可以助之陳平知有餘然難獨任周勃重厚少文然安劉氏者必勃也可令爲太尉呂后復問其次上曰此後亦非乃所知也

人主之職在擇相一相定而天下無餘事呂后至此一語不他及可謂切問矣數公者固高帝平日之所嘗試然劉氏社稷卒賴絳侯北軍之助以安若目擊

其事而處之者抑何見之明哉或者因是遂謂高帝
逆知有呂氏之禍此大不然呂氏之禍蓋惠帝既歿
發於無聊之思當是時年方壯安得預料其必死而
爲之慮乎若周勃重厚少文天下雖有變終不肯負
劉氏是則可必也故高帝之言適與事契耳呂后以
悍篡國固無所逃罪而此擇相之問與帝知人之明
則可爲後世法矣雖然湯之崩也付太甲於伊尹武
王之崩也付成王於周公二公聖人也大明斯道進

嗣君於帝王之盛豈止爲保家之計而已高帝擇相志在安劉此如田夫野叟辛勤致富戛戛然惟恐失之是數公者能爲高帝保家於身後非望其輔嗣君爲三代之規摹也嗚呼必若伊周者而後可也史臣謂帝規摹宏遠愚於此則深病其未宏遠云

右高祖十二年五年始即皇帝位在位八年崩年五十
三

惠帝

太后令永巷囚戚夫人髡鉗衣赭衣令舂遣使召趙王如意使者三反趙相周昌謂使者曰高帝屬臣趙王趙王年少竊聞太后怨戚夫人欲召趙王并誅之臣不敢遣王王且亦病不能奉詔太后怒先使人召昌昌至長安乃使人復召趙王王來未到帝知太后怒自迎趙王霸上與入宮自挾與起居飲食太后欲殺之不得聞

元年冬十二月帝晨出射趙王少不能蚤起太后使人持酖飲之犂明帝還趙王已死太后遂斷戚夫人手足

去眼輝耳飲瘖藥使居廁中命曰人彘居數日乃召帝
觀人彘帝見問知其戚夫人乃大哭因病歲餘不能起
使人請太后曰此非人所爲臣爲太后子終不能治
天下帝以此日飲爲淫樂不聽政

堯舜之道孝弟而已矣惠帝友愛出於天性全護趙
王無所不盡其至真有不待勉強而後從事者如許
美質得大賢爲之師傅發明此心日著日察堯舜之
道豈外是哉一見人彘爲之大哭謂此非人所爲斯

亦良心之動惻怛不能自禁意則善矣惜也未嘗學問不明於義理縱母后殘酷往事無及自今以往攷攷孝道轉移感動豈無其方胡可爲是鬱鬱自陷於非義乎儼然居憂敗度敗禮而莫之檢此不得師傳之明驗也讀太甲三書安得不爲之慨歎

二年秋七月蕭何薨何置田宅必居窮僻處爲家不治垣屋曰後世賢師吾儉不賢母爲勢家所奪

帝王盛時明良遇會不聞有此稱贊後世絕無而僅

有而後書之以爲美談是則可歎也雖然蕭何一掾
主吏耳從高祖起豐沛爲佐命元勲能斂然清儉若
此無何之功居何之位承迎從諛貪濁成風黷貨而
無厭廣田宅而不知止者寧不愧死於斯人矣哉

以曹參爲相國參代何爲相舉事無所變更一遵何約
東擇郡國吏木訥於文辭重厚長者即召除爲丞相史
吏之言文刻深欲務聲名者輒斥去之日夜飲醇酒卿
大夫以下吏及賓客見參不事事來者皆欲有言參輒

飲以醇酒間欲有所言復飲之醉而後去終莫得開說
參子密爲中大夫帝怪相國不治事以爲豈少朕與使
密歸以其私問參參怒答密二百曰趣入侍天下事非
若所當言也至朝時帝讓參曰乃者我使諫君也參免
冠謝曰陛下自察聖武孰與高帝上曰朕乃安敢望先
帝又曰陛下觀臣能孰與蕭何賢上曰君似不及也參
曰陛下言之是也高帝與蕭何定天下法令既明今陛
下垂拱參等守職遵而勿失不亦可乎帝曰善參爲相

國出入三年百姓歌之曰蕭何爲法較若畫一曹參代之守而勿失載其清淨民以寧壹

脫暴秦水火之中出百戰干戈之後民不聊生甚矣一旦乍得休息知有生之可樂此清淨寧壹所以歌也然責以相業則烏可以爲是哉太宰之職古有成憲太甲成王其不敢望湯武也明矣伊尹周公亦將醇飲不事事乎况吕后殘忍於上而惠帝方失德於洎淫此正尚賴正救之時進戒荒寧之日而但日夜

從事於醇酒則將焉用彼相也

四年冬十月立皇后張氏后帝姊魯元公主女也太后
欲爲重親故以配帝

人主天下之表儀禮法之所自出也安有母舅而可
以妻甥乎不典甚矣婦人姑息類多愛女但欲使之
綢繆於母家安知敗常亂倫之可醜也特書之爲後
世戒

除挾書律

始皇三十四年燒書陳餘謂孔鮒曰秦滅先王之籍而子爲書籍之主其危哉子魚曰吾將藏之以待其求高祖五年引兵欲屠魯聞絃誦之聲則是藏書已有出者矣向使斯時即除挾書之律下詔求之則非特書藏未久不甚壞而經生學士亦未甚老也惠帝四年挾書之律雖除而求書之詔未下迨至文帝天下遂亡治尚書者獨故秦博士伏生年過九十詔太常使人受之裁二十餘篇而已他可知也武帝末年

屋壁之藏始出而錯亂磨滅弗可復知者多矣可勝歎哉

右惠帝在位七年崩年二十四

高皇后

太子即皇帝位年幼

或曰太后元年欲王諸呂問王陵陵據白馬之盟力沮之問平勃平勃乃共贊之其是非固易見也然安社稷定劉氏二公者終酬其語則何如愚謹對曰欲

王諸呂特其小小者耳二三大臣與太后同受高帝之天下以遺其後嗣豈太后所得私哉潛育異姓一旦奉之以爲君當是時王陵陳平爲左右相而周勃爲太尉將相合謀扶義而起一正君而國定何不可之有少帝之立也寂然不聞一語王陵之戇獨發於欲王諸呂之日已後矣非劉氏而帝乃不可共擊乎自是以後不特諸呂日長炎炎更立常山以僞易僞倏彼倏此惟所命之羣臣頓首奉詔無不可者顧何

取於社稷之臣也或者見其誅諸呂於太后既歿之後廢僞主迎代王適符初語遂謂平勃始有定謀者平患諸呂力不能制燕居深念幾無策矣用陸賈計始交驩絳侯深相結豈有定謀者乎後日之事特出於天幸耳愚每觀史至文帝二年陳平薨未嘗不爲之驚惋文帝二年太后崩之又二年也使平勃不幸先太后而死則天下事去矣尚復能有所爲乎身爲將相曾不能討賊於篡立之始而徼幸集事於竊國

八年之後斷以大義將逃罪之不暇而何暇以爲功也

右高皇后八年崩

據唐鑑則天例不宜有紀然八年之內兩立少帝皆所名惠帝子非劉氏與中宗事不同姑從史舊揭其始末而不書在位庶有倣於方來

兩漢筆記卷二

欽定四庫全書

兩漢筆記卷三

宋 錢時 撰

文帝

元年冬十二月詔曰法者治之正也今犯法已論而使無罪之父母妻子同產坐之及爲收帑朕甚不取其除收帑諸相坐律令

舜罰弗及嗣文王罪人不孥而況於父母乎高祖入關約法三章餘悉去秦苛法曷爲而收帑相坐復仍

秦舊此蕭相國定律之罪也文帝即位而首除之知所先務矣又明年盜高廟玉環而乃不勝其怒欲致之族抑何歟

三月立太子母竇氏爲皇后皇后清河觀津人有弟廣國字少君幼爲人所略賣傳十餘家聞竇后立乃上書自陳召見驗問得實乃厚賜田宅金錢與兄長君家於長安絳侯灌將軍等曰吾屬不死命且縣此兩人兩人所出微不可不爲擇師傳賓客又復效呂氏大事也於

是乃選士之有節行者與居竇長君少君由此爲退讓
君子不敢以尊貴驕人

戚里之禍大抵主於驕縱而不知學寵之以富貴而
不教之以禮義是猶狂藥飲人而望其勿狂無是理
也絳灌斯言雖懲往事然爲擇師傳賓客實處后族
萬世不易之至論豈特所出之微然哉向使文帝亦
以其處妻黨者處母黨則薄將軍必不以殺漢使死
矣

時有獻千里馬者帝曰鸞旗在前屬車在後吉行日五
六十里師行三十里朕乘千里馬獨先安之於是還其
獻馬與道里費而下詔曰朕不受獻也其令四方毋復
來獻

人主之好惡風俗之樞機也一投之入則靡然環向
者皆蠹心之路矣文帝始即位而却千里馬天下聞
之孰敢有不正伺吾便者哉旅獒之書曰玩人喪德
玩物喪志又曰志以道寧言以道接以文帝之質美

得若召太保者輔之而進於道豈易量也

帝益明習國家事朝而問右丞相勃曰天下一歲決獄
幾何勃謝不知又問一歲錢穀入幾何勃又謝不知惶
愧汗出沾背上問左丞相平平曰有主者上曰主者謂
誰平曰陛下即問決獄責廷尉問錢穀責治粟內史上
曰苟各有主者而君所主者何事也平謝曰陛下不知
其驚下使待罪宰相宰相者上佐天子理陰陽順四時
下遂萬物之宜外鎮撫四夷諸侯內親附百姓使卿大

夫各得任其職焉帝乃稱善右丞相大慙出而責讓陳平曰君獨不素教我對陳平笑曰若居其位不知其任耶且陛下即問長安中盜賊數君欲彊對耶於是絳侯自知其能不如平遠矣居頃之乃謝病請歸相印上許之秋八月辛未右丞相勃免左丞相平專爲丞相

冢宰之職以九職任萬民而生財之有源以九賦斂財賄而取財之有制以九式均節財用而用財之有度是故膳夫則會之庖人則會之酒正則會之大府

外府職歲職帑司裘掌皮典絲典臬莫不有會非冢
宰乃爾屑屑不憚煩也經邦大務正在理財理財與
聚斂異後世言理財者止於聚斂而論者遂以錢穀
之問不至廟堂爲得體是大不然用之無節取之無
藝邦計日匱民力日屈則國不足以爲國矣豈徒一
治粟內史之守而已哉臯陶士也而相禹蘓忿生司
寇也而爲三公冢宰掌建邦之六典刑典其一也歲
終則受百官府之會三歲則大計羣吏之治而誅賞

之是固無所不當問况獄者生人之司命邦之安危
係焉周公位冢宰而立政一書拳拳乎庶獄孰謂主
在廷尉而宰相無與也嚴刑峻法民不堪命苛斂暴
取民不聊生此正宰相非才之明驗豈固置斯人於
度外而他有所謂變理陰陽之道撫安中外之術哉
文帝初政問之及此斯正因事進戒培植本根之日
勃武臣相非其任也不足多罪乎而有知所宜惕然
反觀講求事實而乃務爲捷給以自詫誕斷之大義

曾不若勃謝不知之爲愈也且惠帝六年平始爲左丞相明年帝崩太后臨朝以阿意而右遷兩立少帝皆非劉氏諸呂用事海內大亂天妖地怪無所不有漢祚中絕整整八年平蓋無日而不居相位也太后歿而誅諸呂事殆出於天幸文帝即位平且以功不如勃遜之矣今纔數月而自陳相業有如此寧不厚愧矣哉

吳公薦洛陽人賈誼帝召以爲博士是時賈生年二十

餘帝愛其辭博一歲中超遷至大中大夫賈生請改正朔
易服色定官名興禮樂以立漢制更秦法帝謙讓未遑
也

顏淵問爲邦子曰行夏之時乘殷之輅服周之冕樂
則韶舞曾無一語及於教化豈固若是而遂足以爲
邦歟曰不然雍也可使南面則許之漆雕開自未能
信則說之孔子斯言爲顏氏子而發也使道德不足
以仁民教化不足以善俗則舞韶簡奏桑林而遂謂

之虞商固未可也是故非六律不能正五音而非師
曠之聰亦不能用六律非規矩不能成方員而非離
婁之明公輸子之巧亦不能用規矩秦之法凶人之
具也是豈可以一朝居哉賈生言之而文帝謙遜未
遑何也得非即位之初務爲安靜姑仍舊貫不敢變
更歟抑亦道德當先教化亦皆有所未遑也至於太
初始用夏正色黃數五定官協律以至宗廟朝儀無
所不變而漢之治道固亦武帝耳雖改猶不改也惜

有
卷三
一
哉

二年上所幸慎夫人在禁中常與皇后同席坐及坐郎署袁盎引却慎夫人坐慎夫人怒不肯坐上亦怒起入禁中盎因前說曰臣聞尊卑有序則上下和今陛下既已立后慎夫人乃妾妾主豈可與同坐哉且陛下幸之即厚賜之陛下所以爲慎夫人適所以禍之也陛下獨不見人彘乎於是上乃說召語慎夫人慎夫人賜盎金五十斤

治天下莫先於刑家而刑家之道莫嚴於謹微古者
天子后立六宮三夫人九嬪二十七世婦八十一御
妻以聽天下之內治以明章婦順故天下內和而家
理也九嬪掌婦學之法以教九御皆屬於冢宰而三
夫人之於后則猶三公之於王坐而論婦禮無官職
豈孽妾上僭相與爲淫亂者哉後世不以德選而惟
愛欲之是寵瀆情踰分敗禮亂倫以至骨肉相仇身
膏白刃四國交亂九廟爲墟蓋不特一人彘之禍而

已慎夫人與后同席禁中天子出幸上林習且爲常
其跡著矣袁盎諫之而帝悅之夫人又從而賞之此
雖發於懼禍然不賢亦不能爾也衣不曳地雅稱戈
紼刑家之道有然哉

五月詔曰古之治天下朝有進善之旌誹謗之木所以
通治道而來諫者也今法有誹謗詆言之罪是使衆臣
不敢盡情而上無由聞過失也將何以來遠方之賢良
其除之

朝廷以言爲諱非宗社之福也且天下有道則庶人不議使有可議安能禁人之言雖禁亦何益哉上無諱過之名下有敢言之氣明白洞達有聞即改呼吸開利脉絡貫通天下烏有不治者秦爲無道切切然畏人之議已於是嚴誹謗詆言之法而偶語者且棄市此非特其君之罪也往往姦臣誤國惟恐其過上聞是以鉗天下之口以塗一人之耳目譬猶市井小兒欲人之不見也而自掩其兩眼良可憫笑及至其

後盜滿天下而二世不知兵入宮幃而二世不覺方
怒責宦者曰公何不早告我宦者曰使臣早言皆已
誅安得至今萬乘之貴四海之富乞爲黔首而不可
得矣豈特無以來遠方之賢良哉

前三年冬十二月免丞相勃遣就國乙亥以太尉灌嬰
爲丞相

禹宅百揆而征苗周公位冢宰而征淮夷古之居其
任者皆大聖大賢是故畢公以司馬而爲太師亦無

不可也可以爲文可以爲武入相出將奚所擇哉漢之太尉司馬職也用爲丞相猶有古人文武不分之意然而人物則大不同矣絳灌之儔拔城陷陣從高帝起草萊定天下賞之則可貴之則可使之掌兵柄則可冢宰之職豈其任也高帝垂歿謂勃可令爲太尉文帝即位陳平乃以右丞相遜之嗚呼冢宰掌建邦之六典以佐王治邦國豈武夫健將賞功之具也哉平也旣知宰相上佐天子如是其重大而以之遜

勃何也草昧之初姑置勿論漢至文帝宜知所審矣
一失於勃又再失於灌嬰踵武相承名益不正更丞
相爲大司徒固已舛謬其後遂位大司馬於司徒之
上專摠軍國之大務而終不識冢宰之爲何職矣可
勝嘆哉

初趙王敖獻美人於高祖得幸有娠及貫高事發美人
亦坐繫河內美人母弟趙兼因辟陽侯審食其言吕后
吕后妬弗肯白美人已生子恚即自殺吏奉其子詣上

上悔名之曰長令呂后母之而葬其母真定后封長爲淮南王淮南王蚤失母常附呂后故孝惠呂后時得無患而心怨辟陽侯以爲不彊爭之於呂后使其母恨而死也及帝即位淮南王自以最親驕蹇數不奉法上常寬假之是歲入朝從上入苑囿獵與上同車常謂上大兄王有材力能扛鼎乃往見辟陽侯自袖鐵椎椎辟陽侯令從者魏敬劉之馳走闕下肉袒謝罪帝傷其志爲親故赦弗治當是時薄太后及太子諸大臣皆憚淮南

王淮南王以此歸國益驕恣出入稱警蹕稱制擬於天子袁盎諫曰諸侯太驕必生患上不聽

元年有司請蚤建太子上曰朕既不德縱不能博求天下賢聖有德之人而禪天下而曰豫建太子是重吾不德也又曰楚王季父也吳王兄也淮南王弟也今不選舉而曰必子人其以朕爲忘賢有德者而專於子非所以憂天下也嗚呼美矣三代而下聞斯言哉六年淮南王長乃以謀叛死得非大公無我之論

反有以啟凶人賊子之心乎曰雖然帝則不爲無罪也感念同氣友愛不忘爲之擇師傅明禮義弗納於邪可也今也驕蹇不法則寬假之讎殺辟陽則赦弗治警蹕稱制擬於天子有言者則不聽自作法令行於其國逐漢置使請自置相二千石則曲意以從至甚也擅殺不辜爵人至關內侯數上書不遜順乃始切責風諭以爲儆戒則既晚矣鄭莊公居共叔段於京祭仲曰無使滋蔓蔓難圖也蔓草猶不可除況君

之寵弟子公曰多行不義必自斃忍哉斯人之言雖
文帝友愛非莊公比然養成其惡而不能裁之以義
則一而已愛之者所以禍之歟

張釋之爲公車令太子與梁王共車入朝不下司馬門
於是釋之追止太子梁王無得入殿門遂劾不下公門
不敬奏之薄太后聞之帝免冠謝教兒子不謹薄太后
乃使使承詔赦太子梁王然後得入

紀綱者天子之紀綱也人臣爲天子守紀綱而天子

伸之則上下不至於陵遲而世道立矣太子梁王不
下司馬門而張釋之劾不敬帝即免冠謝太后而自
咎教子之不謹夫如是誰敢亂其紀綱哉因觀當時
人臣大抵皆嚴於法守使人悚然有不可玩之勢皆文
帝有以養成其風節也是故於袁盎之卻坐則屈宮
妾以伸紀綱於釋之之劾不下司馬門則屈世子
以伸紀綱於周亞夫之營細柳則屈天子之尊以伸
紀綱此天下所以不亂而文帝之所以稱賢也敬表

金史卷八十三
卷三
而出之爲後世撓法徇情者之戒

六年梁太傅賈誼上疏曰夫樹國固必相疑之勢下數
被其殃上數爽其憂甚非所以安上而全下也臣竊跡
前事大抵彊者先反長沙乃二萬五千戶功少而最
完勢䟽而最忠非獨性異人也亦形勢然也曩令樊鄴
絳灌據數十城而王今雖以殘亡可也令信越之倫列
爲徹侯而居雖至今存可也則天下之大計可知也欲
諸王之皆忠附則莫若令如長沙王欲臣子勿殖醢則

莫若令如樊鄴等欲天下之治安莫若衆建諸侯而少其力力少則易使以義國小則亡邪心令海內之勢如身之使臂臂之使指莫不制從諸侯之君不敢有異心輻輳並進而歸命天子割地定制令齊趙楚各爲若干國使悼惠王幽王元王之子孫畢以次各受祖之分地地盡而止其分地衆而子孫少者建以爲國空而置之須其子孫生者舉使君之一寸之地一人之衆天子亡所利焉誠以定治而已如此則卧赤子天下之上而

安植遺腹朝委裘而天下不亂

漢懲秦孤立之敗大封同姓跨州兼郡連城數十宮室百官同制京師史氏謂矯枉過正是矣賈誼請衆建諸侯而少其力可爲當時的論其言苟用安有七國之變哉主父偃竊取而行於元朔間已後矣論者未免爲文帝惜之然以愚觀於事勢則蓋有說也自帝而上異姓之王相繼以反誅而同姓固未有一人叛者高后臨朝擅王諸呂漢祚中絕者八年矣微朱

虛東牟與二三大臣共起而誅諸呂定劉氏則漢之
爲漢今何如也帝自藩邸入繼大統然已寒之灰續
垂亡之脉尾大之禍未見而宗彊之助方新後雖有
濟北淮南之釁而興居發於失職奪功旋即敗死厲
王長者當時之論徃徃咎在不爲置嚴傳相驕蹇弗
度以至於是然亦事覺即廢徙無能爲皆非由地大
也賈生年少痛哭而言於帝之心宜未盡合自七國
叛其禍方著天下無異姓彊大之憂而所可慮者獨

在同姓惟見其害而不見其利與文帝時大不侔矣此
主父偃之說所以得行歟雖然責之以先見之明以
義斷恩知幾弭禍則文帝亦不爲無罪也

夏殷周爲天子皆數十世秦爲天子二世而亡人性不
甚相遠也何三代之君有道之長而秦無道之暴也其
故可知也古之王者太子乃生固舉以禮有司齊肅端
冕見之南郊過闕則下過廟則趨故自爲赤子而教固
已行矣孩提有識三公三少明孝仁禮義以道習之遂

去邪人不使見惡行於是選天下之端士孝悌博聞有道術者以衛翼之使與太子居處出入故太子初生而見正事聞正言行正道左右前後皆正人也夫習與正人居之不能毋正猶生長於齊不能不齊言也習與不正人居之不能毋不正猶生長於楚之地不能不楚言也孔子曰少成若天性習慣如自然習與智長故切而不愧化與心成故中道若性夫三代之所以長久者以其輔翼太子有此具也及秦而不然使趙高傳胡亥而

教之獄所習者非斬劓人則夷人之三族也胡亥今日
即位而明日射人忠諫者謂之誹謗深計者謂之妖言
其視殺人若艾草菅然豈惟胡亥之性惡哉彼其所以
道之者非其理故也鄙諺曰前車覆後車誡秦世之所
以亟絕者其轍跡可見也然而不避是後車又將覆也
天下之命縣於太子太子之善在於早諭教與選左右
夫心未濫而先諭教則化易成也聞於道術智誼之指
則教之力也若其服習積慣則左右而已夫胡粵之人

生而同聲嗜慾不異及其長而成俗累數譯而不能相通有雖死而不相爲者則教習然也臣故曰選左右早諭教是急夫教得而左右正則太子正矣太子正而天下定矣書曰一人有慶兆民賴之此時務也

愚觀賈誼書至此一章未嘗不爲之反覆詠歎所習邪正若縑素然投之丹則赤投之墨則黑豈不甚可畏哉聲色玩好之時少而親師傅之時多猶恐鴻鵠將至一暴而十寒況不擇師傅而日與不正人處也

是故賈誼斯言可詔萬世但不知所謂正人者何人
道術者何道諭教者何教耳去聖逾遠異端滋熾當
時學者不入於黃老即入於申韓爲申韓者道申韓
爲黃老者道黃老各守其說自以爲是文帝賢君也
誼之言猶在耳也未幾晁錯爲太子舍人門大夫首
請擇聖人之術以賜太子而其說乃在乎知術數錯
申韓者也其以刑名之書爲聖人之術固也文帝豈
以錯爲不正而用之錯亦豈以其學爲不正而言之

乎是則尤可畏也後世縉紳之論未嘗不曰人主者
帝王之學非儒生章句文墨之謂是固然矣抑嘗真
知帝王之學安所用其力乎曰人心惟危道心惟微
惟精惟一允執厥中者舜也曰安汝止惟幾惟康者
禹也曰不邇聲色不殖貨利曰懋昭大德建中于民
者湯也曰於緝熙敬止曰不識不知順帝之則者文
王也抑亦於此深求其旨而得其所謂學矣乎不然
是謾語也是具文也發踪指迷未見端的使有志於

聖學者果安所用其力也三代而上不可得而詳矣
獨伊尹傳說周公召公之書所以啟迪訓誘自始學
以至成德教法井井典刑具有王者作感念賈生
之言而一以伊傳周召爲講明聖學之標準則庶幾
其不悖矣至若師傳之正不正則又在上之人以古
聖賢爲的而擇焉

十二年晁錯言於上曰貴粟之道在於使民以粟爲賞
罰今募天下入粟縣官得以拜爵得以除罪爵者上之

所擅出於口而無窮粟者民之所種生於地而不乏夫
得高爵與免罪人之所甚欲也使天下人入粟於邊以
受爵免罪不過三歲塞下之粟必多矣帝從之令民入
粟邊拜爵免罪

賞罰者人主之操柄而非人主所得私也天也故曰
天命有德五服五章哉天討有罪五刑五用哉是故
古之聖王官以崇德所以使爲善者勸刑以抵罪所
以使爲惡者懲爲善者勸則天下莫不樂於爲君子

金史卷八十二 卷三
矣爲惡者懲則天下莫不耻於爲小人矣今欲貴粟
而使入主之操柄聽命於富民之手錯不足道也而
帝亦謂然哉

十三年齊太倉令淳于意有罪當刑詔獄逮繫長安其
少女緹縈上書曰妾父爲吏齊中皆稱其廉平今坐法
當刑妾傷夫死者不可復生刑者不可復屬雖後欲改
過自新其道無繇也妾願沒入爲官婢以贖父刑罪使
得自新天子憐悲其意五月詔曰詩曰豈弟君子民之

父母今人有過教未施而刑已加焉或欲改行爲善而道無由至朕甚憐之夫刑至斷支體刻肌膚終身不愈何其刑之痛而不德也豈爲民父母之意哉其除肉刑有以易之盡令罪人各以輕重不亡逃有年而免其爲令

文帝之除肉刑是矣古聖用之然且非歟曰不然治古之世有井田以爲養有學校以爲教有比閭族黨以爲居有冠婚喪祭以爲禮凡所以善人心厚風俗

之道無所不盡其至然猶懼其或入於非義以亂吾俗也於是爲之法制以防之畫之衣冠以威之垂之象魏以曉習之又歲時讀法以訓諭之是明刑者所以弼教也折民於刑者所以降典也好生之德洽於民心比屋可封人人有士君子之行肉刑雖具而未必用也後世教化不明先王所以善人心厚風俗之道掃地盡矣每見所謂一門之內大者可殺小者可論未嘗不爲之痛心疾首嗚呼是誰之咎哉人欲橫

奔風俗敗壞無禮無義以妄爲常爪剛者抉力彊者搏紛紛籍籍與禽獸無異上之人不思所以致此者何由凡古人假之以弼教降典哀矜惻怛而不忍者一切假之爲勝民之具矣是故刑辟愈繁而姦愈不可止夫如是而以肉刑爲重肉刑其果重乎文帝謂教未施而刑已加良可敬服雖然此事殆未易輕於置論愚是以於肉刑之除感世變之非古而爲之重歎也

是時上既躬修玄默而將相皆舊功臣少文多質懲惡亡秦之政論議務在寬厚耻言人之過失化行天下告訐之俗易吏安其官民樂其業畜積歲增戶口寢息風俗篤厚禁罔䟽闊罪疑者予民是以刑罰大省至於斷獄四百有刑錯之風焉

耻言人過失習俗最美最可嘉尚夫羞惡之心人皆有之知所羞惡則見人之過如己有過自應耻言故凡輕於議人終日呶呶揺吻鼓喙而不知耻者必身

安於非義不自恥其耻者也况朝廷議論四方之樞
機一是一非爲模爲楷後世薄惡不特不耻言人過
而已而且詆誹大道誣毀正人訐發陰私風聞失實
以此媚上以此謀身此其用心曾穿窬狗彘之不若
乃方偃然自詭以爲得計夫如是何以養廉耻之節
厚風俗之原哉文帝時非有道德教化一一如先王
之盛也公卿之間耻言人過而遂化行天下告訐俗
易風移篤厚幾至刑錯然則人心之良未嘗泯滅有

感斯應如草從風孟子曰無耻之耻無耻矣朝廷之上一知所耻而天下之耻心生焉奈之何爲人上而不知所務也

十五年趙人新垣平以望氣見上言長安東北有神氣成五采於是作渭陽五帝廟十六年夏四月上郊祀五帝於渭陽五帝廟於是貴新垣平至上大夫賜累千金而使博士諸生刺六經中作王制謀議巡狩封禪事又於長門道北立五帝壇

甚矣異端邪說之善幻也武帝好大喜誇其受文成
五利之詐固宜文帝崇朴爲天下先乃斂退務實之
主賈誼請去秦法立漢制則謙遜未遑張釋之言便
宜事則首命之曰卑之母甚高論夫誰得而入之新
垣平何人也其言一投遂且貴寵立廟壇議封禪相
與爲非禮之禮而不悟得非公孫臣土德之應有以
蕩其心而神氣五采之說遂妖妄於郊見五帝之後
乎周公作無逸而終之曰古之人猶胥訓告胥教誨

民無或胥譸張為幻此厥不聽人乃訓之乃變亂先王之正刑吁可以為戒矣

平又言臣候日再中居頃之日卻復中於是始更以十七年為元年

日行一度一歲一周天瞬息不停晷刻不爽安有卻而復中之理乎一日之不再中亦猶一君之無再元也妖人習幻妄或得以變亂蠢愚之耳目豈謂文帝而亦信之未幾平敗則可以悔矣而改元之繆終成

其詐而弗之變遂使萬世承訛至有一君而改數元者其說乃自新垣平始甚爲文帝惜也

二年八月申屠嘉爲丞相嘉爲人廉直門不受私謁是時太中大夫鄧通方愛幸賞賜累鉅萬帝常燕飲通家其寵幸無比嘉常入朝而通居上旁有怠慢之禮嘉奏事畢因言曰陛下愛幸羣臣則富貴之至於朝廷之禮不可以不肅上曰君勿言吾私之罷朝坐府中嘉爲檄召通詣丞相府不來且斬通通恐入言上上曰汝第往

吾令使人召若通詣丞相免冠跣足頓首謝嘉嘉坐自
如弗爲禮責曰夫朝廷者高帝之朝廷也通小臣戲殿
上大不敬當斬吏今行斬之通頓首首盡出血不解上
度丞相已困通使使持節召通而謝丞相此吾弄臣君
釋之鄧通旣至爲上泣曰丞相幾殺臣

有虞之朝以巧言令色孔壬爲可畏而孔子答爲邦
之問亦曰遠佞人文帝平時身則衣弋綈幃帳則無
文繡以至宮室苑囿車騎御服罷露臺治霸陵無一

事不以朴儉先天下及於鄧通一有所溺賞累鉅萬
賜之銅山燕飲其家寵幸無比乃全不類帝平時之
所爲者戲弄殿廷之上而丞相言之切矣則曰君勿
言吾私之檄召而折辱之是矣則又曰吾弄臣君釋
之奪其聰明幾於無耻戀戀愛護莫能斷割甚矣小
人之可畏而難遠也以文帝之賢猶不免此萬世之
下可不深懲而痛絕之乎

七年遺詔曰朕既不德無以佐百姓今崩又使重服久

臨以惟寒暑之數哀人父子傷長老之志損其飲食絕
鬼神之祭祀以重吾不德謂天下何其令天下吏民令
到出臨三日皆釋服毋禁取婦嫁女祠祀飲酒食肉自
當給喪事服臨者皆無跣絰帶無過三寸毋布車及兵
器毋發民哭臨宮殿中殿中當臨者皆以旦夕各十五
舉音禮畢罷非旦夕臨時禁毋得擅哭臨已下棺服大
功十五日小功十四日纖七日釋服

暮而小祥又暮而大祥中月而禫此天下之通喪也

君親同之三代而上未之有改是可率意而輕變乎
春秋以後禮廢樂壞必有不能盡如古制者宰予洙
泗高第且發碁已久矣之問滕世子行三年之喪而
父兄百官皆不欲曰吾宗國魯先君莫之行吾先君
亦莫之行此可見矣然未有如文帝截然定爲三十
六日之制而以功總易斬哀者遂使短喪相承爲歷
代之典故是教天下後世臣子之忍於君父也豈不
繆哉雖然景帝則尤可罪也滕世子不能自決復問

孟子孟子曰是在世子世子曰然是誠在我文帝姑
息以爲仁而不明先王之大道固也言之而不行則
已矣爲景帝者獨無人子之心乎獨不能斷之以義
作滕世子之見乎屈到嗜芰有疾召其宗老而屬之
曰祭我必以芰及祥宗老將薦芰屈建命去之君子
曰違而道一果食之微且不可從父於非義况父命
以短喪而遂從之食稻衣錦而安焉如之何其可也
因考高帝崩二十三日而葬惠帝二十四日文帝

纔七日且即位四年而作顧成廟又預治霸陵皆不典
此由在廷之臣無知禮者是以舛繆若此故雖短喪
亦不以爲異也

右文帝在位二十三年崩年四十六

景帝

二年六月丞相申屠嘉薨時內史晁錯數請問言事輒
聽寵幸傾九卿法令多所更定丞相嘉自絀所言不用
疾錯錯爲內史東出不便更穿一門南出南出者太上

皇廟塋垣也嘉聞錯穿宗廟垣爲奏請誅錯客有語錯錯恐夜入宮上謁自歸上至朝嘉請誅內史錯上曰錯所穿非真廟垣乃外塋垣故穴官居其中且又我使爲之錯無罪丞相嘉謝罷朝嘉謂長史曰吾悔不先斬錯乃請之爲錯所賣至舍因毆血而死錯以此愈貴

此有以見景帝習於晁錯之術數而不正大也申屠嘉爲丞相首折小臣之無禮文帝雖極寵幸檄召而不敢庇度已困通而始召之此其氣象儼然如泰山

喬嶽使朝廷之體增重景帝即位所宜敬禮而委心
焉設使有罪當罷即罷耳奈何偏徇所愛遂虛置於
無用使錯穿廟垣以便其私固已不正大之甚逆知
丞相之欲罪之也錯夜入謁私相爲謀而且以身當
之此何爲者哉皆由平時術數習熟機變以爲巧比
周以爲私竟使先朝重臣飲恨而死是可歎也因觀
文帝十五年錯請削諸侯及法令可更定者書凡三
十篇上雖奇其材而不盡聽必有見於錯者矣景帝

一即位而前日之不聽者盡用無餘茲固景之不如
文遠甚而錯小器亦速死之道也夫

梁孝王以竇太后少子故有寵王四十餘城居天下膏
腴地賞賜不可勝道府庫金錢且百鉅萬珠玉寶器
多於京師築東苑方五百餘里廣睢陽城七十里大治
宮室爲複道自宮連屬於平臺三十餘里招延四方豪俊
之士如吳人枚乘嚴忌齊人羊勝公孫詭鄒陽蜀人司
馬相如之屬皆從之遊每入朝上使使持節以乘輿駟

馬迎梁王於闕下既至寵幸無比入則侍上同輦出則同車射獵上林中因上䟽請留且半歲梁侍中郎謁者著籍引出入天子殿門與漢宮官無異 前三年冬十月梁王來朝時上未置太子與梁王宴飲從容言曰千秋萬歲後傳於王王辭謝雖知非至言然心內喜太后亦然詹事竇嬰引卮酒進上曰天下者高祖之天下父子相傳漢之約也上何以得傳梁王太后由此憎嬰嬰因病免太后除嬰門籍不得朝請梁王以此益驕

又前六年賈誼請衆建諸侯而少其力固的論矣十
一年梁王揖薨則請爲王立後大益梁睢陽地使梁
足以扞齊趙淮陽足以禁吳楚帝從誼計遂徙淮陽
王武爲梁王北界泰山西至高陽得大縣四十餘城
是何誼言之自背也夫梁淮陽固文帝子也今日之
梁淮陽即前日之齊趙吳楚今日而使其力足以扞
禁寧保他日之不齊趙吳楚也耶當時諸侯王固患
在彊大誼之爲計固主於分其地弱其勢也縱未能

遂行之抑損之制正當自帝子始以示天下至公一
旦有所施爲舉無得而辭於我矣奈何復大封其子
以之抗制諸國而能使之恬然不我怨者况諸侯王
錯列宇內又豈一梁王所能蕃扞之乎天下者高帝
之天下又皆高帝之孫子所親者日寵之所踈者日
削之七國之變未必不有激於此也景帝三年梁王
來朝帝從容宴飲有相傳之一語王以此益驕中二
年遂求爲漢嗣殺袁盎賴田叔得不死人皆咎帝一

語之失有以致之愚謂階之爲禍自賈誼始矣

晁錯數上書言吳過可削文帝寬不忍罰以此吳日恣橫及帝即位錯說上曰昔高帝初定天下昆弟少諸子弱大封同姓齊七十餘城楚四十餘城吳五十餘城封三庶孽分天下半今吳王前有太子之郤詐稱病不朝於古法當誅文帝弗忍因賜几杖德至厚當改過自新反益驕溢即山鑄錢煮海水爲鹽誘天下亡人謀作亂今削之亦反不削亦反削之其反亟禍小不削反遲禍

大上令公卿列侯宗室雜議莫敢難及楚王戊來朝錯
因言戊往年爲薄太后服私姦服舍請誅之詔赦削
東海郡及前年趙王有罪削其常山郡膠西王卬以賣
爵事有姦削其六縣廷臣方議削吳吳王恐削地無
已因發謀舉事念諸侯無足與計者聞膠西王勇好兵
諸侯皆畏憚之於是使中大夫應高口說膠西王膠西
群臣或聞王謀諫曰諸侯地不能當漢十二爲叛逆以
憂太后非計也今承一帝尚云不易假令事成兩主分

爭患乃益生王不聽遂發使約齊菑川膠東濟南皆詐
諾及削吳會稽豫章郡書至吳王遂先起兵誅漢吏二
千石以下膠西膠東菑川濟南楚趙亦皆反齊王後悔
背約城守吳王起兵於廣陵西涉淮因并楚兵發使遣
諸侯書罪狀晁錯欲合兵誅之

大抵積弊不可以驟革深根固蒂之病不可以頓除
除之速革之遽則未有不召變致亂者七國之禍自
高帝而種此根矣至文帝時有國各三數十年而其

兆日益以著賈誼請分之而帝不聽晁錯請削之而帝不忍此其弊雖若寬縱以養禍然未能害其能容也景帝即位推恩於同姓威刑不耀而德澤日加使之有感而無怨可懷而不可怒然後取誼之策裂土地而侯封之不然者削之不服者誅之內之不失骨肉之親外不廢國家之法夫誰曰不可安有嗣服未幾吾先帝之所優容而不忍者据摠往事一切行之頓舉驟發不少遼緩使諸國合爲一怨仇然相向若蝟

毛而起此固勢之所必至無足怪也錯之言不行於文帝而栽培醞釀於儲官則有日矣一旦得君傾倒而出以快其平日之所欲爲而不顧嗚呼錯亦小丈夫矣哉論者往往謂錯以忠而受禍是不然世固有爲謀雖忠而舉措之失宜區處之乖方以至誤國禍天下者多矣君子不謂忠也於錯乎何恤

後元年帝居禁中召周亞夫賜食獨置大胾無切肉又不置箸亞夫心不平顧謂尚席取箸上視而笑曰此非

不足君所乎亞夫免冠謝上上曰起亞夫因趨出上目送之曰此鞅鞅非少主臣也居無何亞夫子爲父買工官尚方甲楯五百被可以葬者取庸苦之不與錢庸知其盜買縣官器怨而上變告子事連汙亞夫旣聞上下吏更簿責亞夫亞夫不對上罵之曰吾不用也召詣廷尉廷尉責問曰若侯欲反何亞夫曰臣所買器乃葬器也何謂反乎吏曰君縱不欲反地上即欲反地下耳吏侵之益急初吏捕亞夫亞夫欲自殺其夫人止之以故

得不死遂入廷尉因不食五日嘔血而死

文帝之遺其後嗣者相則有申屠嘉將則有周亞夫
兩人剛方不撓有氣節使之輔少主必有可觀而皆
以憤悶嘔血死甚可爲景帝惜也文帝且崩戒太子
曰即有緩急周亞夫真可任將兵其於細柳得之審
矣而卒定七國之亂豈負文帝知人之明哉粟太子
之廢而固爭之大臣職也而帝遂疏之其辨侯王信
之非約諫侯徐盧等之非所以勸後皆至論也而帝

遂免之此固已不滿人意至若賜食大馘不署箸則輕薄甚矣豈人君之所以禮貌大臣者哉帝乃目送之曰此鞅鞅非少主臣是時太子年十四得非將有所屬而不足於此故有是言乎愚謂欲觀大臣之氣節授之以輔遺託孤之重寄者其禮亦不如是也反覆而觀諸景帝大抵得於晁錯者爲多

二年夏四月詔曰雕文刻鏤傷農事者也錦綉纂組害女工者也農事傷則飢之本也女工害則寒之原也夫飢

寒並至而能亡爲非者寡矣朕親耕后親桑以奉宗廟
粢盛祭服爲天下先不受獻減太官省繇賦欲天下務
農蠶素有蓄積以備災害彊毋攘弱衆毋暴寡老者以
壽終幼孤得遂長今歲或不登民食頗寡其咎安在或
詐僞爲吏吏以貨賂爲市漁奪百姓侵牟萬民縣丞長吏
也姦法與盜盜甚無謂也其令二千石各修其職不事
官職耗亂者丞相以聞請其罪布告天下使明知朕意
景不如文亦明矣然言治者必曰文景何也蓋自春

秋戰國歷暴秦更劉項戰鬪之禍寓宇分裂生民塗炭至於文帝乃始以朴儉先天下務農重穀省刑罰薄稅斂而遂措斯世於休養生息之地三代而下未之有也景帝嗣服雖不如文而此數事所以厚民元氣養國命脉者則能遵守無所變亂是以相繼四十年海內富庶風俗醇厚而西都之盛獨稱文景歟右景帝在位十六年崩年四十八

兩漢筆記卷三